

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ৫১/২০১৭-১৮

ঢাকা, রোববার ১৭ সেপ্টেম্বর ২০১৭, ২ আশ্বিন, ১৪২৪

আজকের দৈনিক পত্রিকাগুলো নিম্নলিখিত বিষয় প্রাধান্য দিয়ে খবর ছেপেছে :

- ১। জাতিসংঘের সাধারণ অধিবেশনে যোগ দিতে নিউইয়র্কের পথে প্রধানমন্ত্রী
- ২। বিমস্টেকের জন্য মুক্তবাণিজ্য এলাকা গঠনে দ্রুত সমঝোতা চুক্তি স্বাক্ষর জরুরি
: কলকাতায় বিমস্টেক প্রদর্শনী উদ্বোধনকালে শিল্পমন্ত্রী
- ৩। সাধারণ শিক্ষাপ্রতিষ্ঠান ও মাদ্রাসায় কারিগরি শাখা সংযোজন করা হবে : শিক্ষামন্ত্রী
- ৪। দুই লাখ রোহিঙ্গা শিশুর জন্য টিকা ও ভিটামিন দেওয়া হচ্ছে : স্বাস্থ্যমন্ত্রী
- ৫। রোহিঙ্গাদের আশ্রয় দিয়ে বাংলাদেশ দৃষ্টান্ত স্থাপন করেছে : ব্রিটিশ হাইকমিশনার
- ৬। রোহিঙ্গা ছড়িয়েপড়া ঠেকাতে নজরদারি বাড়ানো হয়েছে : আইজিপি
চট্টগ্রামে ২৭ চেকপোস্ট, পূজামণ্ডপে নিরাপত্তায় ৫০ হাজার পুলিশ সদস্য
- ৭। দোহাজারী-কক্সবাজার-ঘুনধুম রেলপথ নির্মাণ শুরু আগামী নভেম্বরে
: ঠিকাদার প্রতিষ্ঠানের সঙ্গে চুক্তি স্বাক্ষর
- ৮। ওএমএসে চাল বিক্রি আজ থেকে শুরু
- ৯। সৌদি আরব থেকে দেশে ফিরতে আরও এক মাস সময় পেল অবৈধ বাংলাদেশিরা
- ১০। ওজোনস্তর রক্ষায় বাংলাদেশের সাফল্যের প্রশংসা করেছে ইউএনডিপি

১। জাতিসংঘের সাধারণ অধিবেশনে যোগ দিতে নিউইয়র্কের পথে প্রধানমন্ত্রী

জাতিসংঘের ৭২তম সাধারণ অধিবেশনে যোগ দিতে নিউইয়র্কের পথে ঢাকা ছেড়েছেন প্রধানমন্ত্রী শেখ হাসিনা। মায়ানমারের রোহিঙ্গা সংকটের মূল কারণগুলো তুলে ধরে তা নিরসনে বাংলাদেশের প্রস্তাব তিনি সেখানে বিশ্ব নেতাদের সামনে তুলে ধরবেন। গতকাল (১৬ সেপ্টেম্বর শনিবার) দুপুর ২টা ১০ মিনিটে তিনি বিমান বাংলাদেশ এয়ারলাইন্সের একটি ভিডিআইপি ফ্লাইটে আবুধাবির উদ্দেশ্যে রওনা হন। সেখান থেকে আজ (১৭ সেপ্টেম্বর রোববার) সকালে ইতিহাদের ফ্লাইটে তিনি যুক্তরাষ্ট্রে পৌঁছাবেন। সূত্র-সমকাল (শেষ পৃ.,ক.৫), সংবাদ (শেষ পৃ.,ক.১), ইন্ডিপেনডেন্ট (পৃ.১,ক.৮), ডেইলি সান (পৃ.১,ক.১)। ইত্তেফাক, সংবাদ, জনকণ্ঠ, যুগান্তর, ইন্ডিপেনডেন্ট, ডেইলি স্টার, অবজারভার, নিউজ টুডেসহ অধিকাংশ পত্রিকা এ বিষয়ে ছবিসহ খবর ছেপেছে।

২। বিমস্টেকের জন্য মুক্তবাণিজ্য এলাকা গঠনে দ্রুত সমঝোতা চুক্তি স্বাক্ষর জরুরি

: কলকাতায় বিমস্টেক প্রদর্শনী উদ্বোধনকালে শিল্পমন্ত্রী

বিমস্টেক'র সদস্যভুক্ত দেশগুলোতে বিদ্যমান অর্থনৈতিক উন্নয়নের অপার সম্ভাবনা কাজে লাগাতে পারস্পরিক সহায়তা, ব্যবসাবাণিজ্য ও বিনিয়োগ সম্পর্ক জোরদারের ওপর গুরুত্ব দিয়েছেন শিল্পমন্ত্রী আমির হোসেন আমু। তিনি বলেন, বিশ্বের মোট জনসংখ্যার শতকরা ২১ ভাগ বিমস্টেক জোটভুক্ত দেশগুলোতে বাস করছে। জোটের সমষ্টিগত জিডিপি'র পরিমাণ ৭৫০ বিলিয়ন মার্কিন ডলার হলেও দেশগুলোর সম্মিলিত বাণিজ্যের পরিমাণ এখনও বিশ্ববাণিজ্যের মাত্র ৭ শতাংশ। দ্বিপাক্ষিক ও বহুমাত্রিক বিনিয়োগ এবং বাণিজ্য বাড়িয়ে এ অঞ্চলের জনগণের টেকসই অর্থনৈতিক উন্নয়ন সম্ভব হবে বলে তিনি মন্তব্য করেন। ভারত আয়োজিত 'বিমস্টেক প্রদর্শনী-২০১৭' এর উদ্বোধন অনুষ্ঠানে প্রধান অতিথির বক্তব্যে মন্ত্রী এসব কথা বলেন। সূত্র-ইত্তেফাক (পৃ.১৮,ক.২), জনকণ্ঠ (পৃ.১৮,ক.২), ডেইলি সান বিজনেস পাতা (পৃ.১,ক.৬), নিউ এজ বিজনেস পাতা (পৃ.১,ক.২)।

৩। সাধারণ শিক্ষাপ্রতিষ্ঠান ও মাদ্রাসায় কারিগরি শাখা সংযোজন করা হবে : শিক্ষামন্ত্রী

প্রথমবারের মতো সরকারি উদ্যোগে এক সঙ্গে দেশের প্রায় সাড়ে তিনশ' শিক্ষার্থী চীন সরকারের স্কলারশিপ পেল। এরা চীনের সরকারি শিক্ষাপ্রতিষ্ঠানগুলোতে তিনবছর মেয়াদি ডিপ্লোমা ইঞ্জিনিয়ারিং পড়বে। ডিগ্রি শেষে চীনে উচ্চশিক্ষা ও কর্মসংস্থানের সুযোগও পাচ্ছেন তারা। স্কলারশিপপ্রাপ্ত কারিগরি শিক্ষাস্তরের ৩৪৯ জন শিক্ষার্থীর যাত্রাপূর্ব ওরিয়েন্টেশন কর্মসূচিতে শিক্ষামন্ত্রী নুরুল ইসলাম নাহিদ সহযোগিতার জন্য চীন সরকারকে ধন্যবাদ জানিয়ে ঘোষণা করেন, টেলে সাজানো হচ্ছে দেশের কারিগরি শিক্ষার কারিকুলাম-সিলেবাস। সাধারণ শিক্ষাপ্রতিষ্ঠান ও মাদ্রাসায় কারিগরি শাখা সংযোজন করা হবে। গতকাল (১৬ সেপ্টেম্বর শনিবার) আইডিইবি মিলনায়তনে কারিগরি শিক্ষা অধিদফতর আয়োজিত ওরিয়েন্টেশন কর্মসূচির উদ্বোধন অনুষ্ঠানে শিক্ষামন্ত্রী এসব কথা বলেন। সূত্র-জনকণ্ঠ (শেষ পৃ.,ক.৭), ইত্তেফাক (পৃ.৩,ক.৫), নিউজ টুডে (পৃ.২,ক.৬), নিউ নেশন (পৃ.৩,ক.২)।

৪। দুই লাখ রোহিঙ্গা শিশুর জন্য টিকা ও ভিটামিন দেওয়া হচ্ছে : স্বাস্থ্যমন্ত্রী

নির্যাতনের শিকার হয়ে মায়ানমার থেকে বাংলাদেশে পালিয়ে আসা প্রায় দুই লাখ রোহিঙ্গা শিশুকে হাম ও পোলিও টিকা এবং ভিটামিন এ ক্যাপসুল দেওয়া হচ্ছে। স্বাস্থ্যমন্ত্রী মোহাম্মদ নাসিম বলেছেন, মায়ানমার থেকে আসা রোহিঙ্গা শিশুদের জন্য রোগব্যাধির প্রতিষেধক টিকা দেওয়া হচ্ছে। এর মধ্যে রয়েছে এক লাখ ২০ হাজার হাম (রুবেলা) ও ৪০ হাজার পোলিও টিকা এবং ৩৮ হাজার ভিটামিন এ ক্যাপসুল। গতকাল (১৬ সেপ্টেম্বর শনিবার) কক্সবাজারের উখিয়ার কুতুপালং রোহিঙ্গা ক্যাম্পে স্বাস্থ্যমন্ত্রী সাংবাদিকদের এ কথা বলেন। টেকনাফ ও উখিয়ায় গতকাল সকাল থেকে রোহিঙ্গা শিশুদের টিকা দেওয়া শুরু হয়েছে। সূত্র-সমকাল (পৃ.২,ক.১), যুগান্তর (শেষ পৃ.,ক.৪)।

৫। রোহিঙ্গাদের আশ্রয় দিয়ে বাংলাদেশ দৃষ্টান্ত স্থাপন করেছে : ব্রিটিশ হাইকমিশনার

ব্রিটিশ হাইকমিশনার অ্যালিসন ব্লেইক বলেছেন, সংকটময় মুহূর্তে রোহিঙ্গাদের আশ্রয় দিয়ে বাংলাদেশ বিশ্বে দৃষ্টান্ত স্থাপন করেছে। ইতোমধ্যে চার লাখ রোহিঙ্গা বাংলাদেশে এসে আশ্রয় নিয়েছে। এটা যেকোনো দেশের জন্য একটি বড় চ্যালেঞ্জ। গতকাল (১৬ সেপ্টেম্বর শনিবার) হাইকমিশনার ব্লেইক তাঁর বারিধারার বাসভবনে সংবাদমাধ্যমের প্রতিনিধিদের সঙ্গে আলাপকালে এসব কথা বলেন। তিনি বলেন, এই

=৩=

সংকটের জন্য দায়ী না হলেও বাংলাদেশকে বড় চ্যালেঞ্জ মোকাবিলা করতে হচ্ছে। মায়ানমারকেই এই সংকট নিরসনে পদক্ষেপ নিতে হবে। সূত্র-ইত্তেফাক (পৃ.১৯,ক.৫), অবজারভার (পৃ.১,ক.৬), নিউজ টুডে (পৃ.১,ক.২), ডেইলি সান (পৃ.১,ক.১)।

৬। রোহিঙ্গা ছড়িয়েপড়া ঠেকাতে নজরদারি বাড়ানো হয়েছে : আইজিপি

চট্টগ্রামে ২৭ চেকপোস্ট, পূজামণ্ডপে নিরাপত্তায় ৫০ হাজার পুলিশ সদস্য

পুলিশের মহাপরিদর্শক (আইজিপি) এ কে এম শহীদুল হক বলেছেন, রোহিঙ্গারা যেন দেশের ভেতর ছড়িয়ে পড়তে না পারে, সেজন্য গোয়েন্দা নজরদারি বাড়ানো হয়েছে। পাশাপাশি বিভিন্ন সড়কে চেকপোস্ট বসানো হয়েছে। এমনকি যাত্রীবাহী বাসসহ বিভিন্ন যানবাহনেও তল্লাশি করা হচ্ছে। তিনি গতকাল (১৬ সেপ্টেম্বর শনিবার) গাজীপুরের কাপাসিয়ায় টোক নয়নবাজার পুলিশ তদন্তকেন্দ্র উদ্বোধনকালে এ কথা বলেন। সমকাল (পৃ.১৯,ক.৫), সংবাদ (শেষ পৃ.,ক.১)।

এদিকে কক্সবাজারে আসা রোহিঙ্গাদের ছড়িয়েপড়া ঠেকাতে চট্টগ্রাম বিভাগের চার জেলার বিভিন্ন প্রবেশপথে ২৭টি চেকপোস্ট বসিয়েছে পুলিশ। এ ছাড়া বিভাগের ১১ জেলায় দুর্গাপূজায় সাড়ে তিন হাজার মণ্ডপের নিরাপত্তায় আইনশৃঙ্খলা রক্ষাকারী বাহিনীর ৫০ হাজার সদস্য থাকবেন। গতকাল (১৬ সেপ্টেম্বর শনিবার) চট্টগ্রাম নগরের খুলশীতে নিজ কার্যালয়ে এক মতবিনিময় সভায় এসব তথ্য জানান পুলিশের চট্টগ্রাম রেঞ্জের ডিআইজি এসএম মনিরুজ্জামান। সভায় রোহিঙ্গা ইস্যুতে উস্কানি ছড়িয়ে কেউ যাতে পূজামণ্ডপে অপ্রীতিকর পরিস্থিতি সৃষ্টি করতে না পারে সে ব্যাপারে সতর্ক থাকার নির্দেশ দিয়েছেন তিনি। সূত্র-সমকাল (পৃ.২,ক.৩) সংবাদ (পৃ.১,ক.২), নিউজ টুডে (পৃ.১,ক.৫), নিউ নেশন (পৃ.১,ক.১)।

৭। দোহাজারী-কক্সবাজার-ঘুনধুম রেলপথ নির্মাণ শুরু আগামী নভেম্বরে

: ঠিকাদার প্রতিষ্ঠানের সঙ্গে চুক্তি স্বাক্ষর

কক্সবাজার সমুদ্র সৈকতে পর্যটকদের যাতায়াতের সুবিধার্থে চলতি বছরের নভেম্বর থেকেই শুরু হচ্ছে দোহাজারী-কক্সবাজার-ঘুনধুম রেলপথ নির্মাণকাজ। প্রাথমিকভাবে দোহাজারী-রামু-কক্সবাজার পর্যন্ত ১৪০ কিলোমিটার রেলপথ নির্মাণ করা হবে। এ প্রকল্পের আওতায় কক্সবাজারে নির্মাণ করা হবে আন্তর্জাতিক মানের রেলস্টেশন। প্রকল্প নির্মাণে ব্যয় ধরা হয়েছে ১৮ হাজার ৩৪ কোটি টাকা। এর মধ্যে এশিয়ান উন্নয়ন ব্যাংক (এডিবি) ঋণ দিচ্ছে ১৩ হাজার ১১৫ কোটি টাকা। বাকি ৪ হাজার ৯১৯ কোটি টাকা সরকারের ফান্ড থেকে ব্যয় করা হবে। প্রকল্পটি নির্মাণে মেয়াদ ধরা হয়েছে ২০১০ সালের ১লা জুলাই থেকে ২০২২ সালের ৩০ জুন পর্যন্ত। প্রকল্পটি নির্মাণে গতকাল (১৬ সেপ্টেম্বর শনিবার) রেলভবনে ঠিকাদার প্রতিষ্ঠানের সঙ্গে একটি চুক্তি স্বাক্ষর করে রেলওয়ে। এ সময় রেলমন্ত্রী মো. মুজিবুল হকসহ অন্যান্য উর্ধ্বতন কর্মকর্তারা উপস্থিত ছিলেন। সূত্র-সংবাদ (শেষ পৃ.,ক.২), ইনকিলাব (শেষ পৃ.,ক.৬), নিউজ টুডে (পৃ.৩,ক.৬), বাংলাদেশ টুডে (শেষ পৃ.,ক.৬)।

৮। ওএমএসে চাল বিক্রি আজ থেকে শুরু

দেশের বিভাগীয় ও জেলা শহরে আজ (১৭ সেপ্টেম্বর রোববার) থেকে ওএমএসের মাধ্যমে চাল বিক্রি শুরু হচ্ছে। প্রতি কেজি ৩০ টাকা দরে চাল বিক্রি করা হবে বলে খাদ্য মন্ত্রণালয় সূত্রে জানা গেছে। তবে খোলা বাজারে ১৭ টাকা কেজিতে আটা বিক্রি করা হবে। এছাড়া আগামী (২০ সেপ্টেম্বর বুধবার) থেকে হতদরিদ্রদের জন্য 'খাদ্যবান্ধব কর্মসূচি' শুরু হবে। এখানে ১০ টাকা কেজি দরে চাল বিক্রি করা হবে। গত ১৪ সেপ্টেম্বর বৃহস্পতিবার

এক সংবাদ সম্মেলনে খাদ্যমন্ত্রী কামরুল ইসলাম ওএমএস চালুর ঘোষণা দেন। সূত্র-সমকাল (পৃ.১,ক.৪), যুগান্তর (শেষ পৃ.,ক.২)।

৯। সৌদি আরব থেকে দেশে ফিরতে আরও এক মাস সময় পেল অবৈধ বাংলাদেশিরা

সৌদি আরবে অবৈধভাবে বসবাসরত বাংলাদেশিদের সাজা ছাড়া দেশে ফেরার সুযোগ দিতে সাধারণ ক্ষমার মেয়াদ আরও একমাস বাড়ানো হয়েছে। রিয়াদে বাংলাদেশ দূতাবাসের এক সংবাদ বিজ্ঞপ্তিতে জানানো হয়েছে, অবৈধ অভিবাসীরা ১৬ সেপ্টেম্বর থেকে ১৫ অক্টোবর পর্যন্ত সাধারণ ক্ষমার সুযোগ নিয়ে বিনা জরিমানায় দেশে ফিরতে পারবেন। সূত্র-জনকণ্ঠ (পৃ.১,ক.৮), সমকাল (শেষ পৃ.,ক.৫), নিউজ টুডে (শেষ পৃ.,ক.১), ডেইলি সান (শেষ পৃ.,ক.১)।

=8=

১০। ওজোনস্তর রক্ষায় বাংলাদেশের সাফল্যের প্রশংসা করেছে ইউএনডিপি

বাংলাদেশে নিযুক্ত ইউএনডিপি'র ভারপ্রাপ্ত কান্ট্রি ডিরেক্টর কয়কো ইয়োকসু মন্ট্রিয়ল প্রটোকলের সফল বাস্তবায়নের জন্য বাংলাদেশ সরকারের প্রশংসা করেছেন। গতকাল (১৬ সেপ্টেম্বর শনিবার) রাজধানীর বনভবনে বিশ্ব ওজোন দিবস উপলক্ষে আয়োজিত এক আলোচনাসভায় তিনি এ প্রশংসা করেন। পরিবেশ ও বনমন্ত্রী আনোয়ার হোসেন মঞ্জু অনুষ্ঠানে প্রধান অতিথির বক্তব্য দেন। সূত্র-জনকণ্ঠ (শেষ পৃ.,ক.১), সমকাল (পৃ.৫,ক.১), নিউজ টুডে (পৃ.২,ক.৬)।

সম্পাদকীয়

- ক. **ইত্তেফাক :** ইউনেস্কোর হিসাব অনুযায়ী বাংলাদেশে সাক্ষরতার হার ৬১.৫ শতাংশ হওয়ায় দেশের অর্থনৈতিক উন্নতির লক্ষ্যে সাক্ষরতার হার শতভাগ করতে কার্যকর পদক্ষেপ নেওয়ার আহ্বান।
- খ. **সংবাদ :** অপ্রতুল বরাদ্দের কারণে দেশের প্রাথমিক বিদ্যালয়গুলোতে অবকাঠামো উন্নয়ন করা যাচ্ছে না উল্লেখ করে এ খাতে বরাদ্দ বাড়ানোর পাশাপাশি অনিয়ম-দুর্নীতি রোধে কঠোর ব্যবস্থা নেওয়ার ওপর গুরুত্বারোপ।
- গ. **ভোরের কাগজ :** সেবা সংস্থাগুলোর সমন্বয়হীনতায় রাজধানীর দুই সিটি করপোরেশনের উভয় অংশের সড়কজুড়েই অপরিকল্পিত খোঁড়াখুঁড়ি চলায় তা জনদুর্ভোগের কারণ হচ্ছে উল্লেখ করে এ অবস্থা নিরসনে রাজধানীর উন্নয়ন প্রক্রিয়ায় সম্পৃক্ত বিভিন্ন সরকারি ও স্বায়ত্তশাসিত সংস্থাগুলিকে সমন্বয়ের মাধ্যমে কাজ করার সুপারিশ।
- ঘ. **সমকাল :** স্বাস্থ্যসেবা নিশ্চিতের লক্ষ্যে প্রতিষ্ঠিত কমিউনিটি ক্লিনিকের অনেকগুলোর দুরবস্থায় উদ্বেগ প্রকাশ করে এ অবস্থা নিরসনে কার্যকর পদক্ষেপ নেওয়ার সুপারিশ।
- ঙ. **প্রথম আলো :** ফেরিস্বল্পতার কারণে মানিকগঞ্জের পাটুরিয়া ও রাজবাড়ীর দৌলতদিয়া নৌপথে চলাচলকারী যানবাহনগুলোর যাত্রী ও শ্রমিকদের যে দুর্ভোগে পড়তে হচ্ছে তা গ্রহণযোগ্য নয় উল্লেখ করে এ ব্যাপারে নৌপরিবহণ মন্ত্রণালয়ের দৃষ্টি আকর্ষণ।
- চ. **নিউ এজ :** রেলওয়ের সেবার মান বাড়িয়ে আধুনিক ও যুগোপযোগী করার ওপর গুরুত্বারোপ।
- ছ. **ডেইলি স্টার :** চালের দাম উর্ধ্বমুখী হওয়ায় উদ্বেগ প্রকাশ করে এ ব্যাপারে কার্যকর ব্যবস্থা নেওয়ার সুপারিশ করে সম্পাদকীয় প্রকাশ।

উপ-সম্পাদকীয়

আলোকিত বাংলাদেশ পত্রিকায় প্রকাশিত কলামে উল্লেখ করা হয়েছে, শিক্ষা ও শিক্ষাপ্রতিষ্ঠানের গুণগতমান বাড়িয়ে বিশ্বমানের পর্যায়ে পৌঁছাতে হবে।

নিবন্ধ ও ফিচার

সংবাদ পত্রিকায় প্রকাশিত 'বন্যা হয় প্রাকৃতিক ও মনুষ্যসৃষ্ট কারণে' শিরোনামের নিবন্ধে অভিমত

প্রকাশ করা হয়েছে, বন্যার তীব্রতা ও বিস্তার হ্রাস করার জন্য নদীর গতিপথে বন্যা নিয়ন্ত্রক জলাধার তৈরি করা উচিত।

#

ফাহিমা/মরজিনা/সাইদা/রশীদ/তানিয়া/২০১৭/৯.০০ ঘণ্টা